



KEMENTERIAN SUMBER MANUSIA

KENYATAAN MEDIA

MAJLIS PELANCARAN SKILLSMALAYSIA 2.0: SKILLS4ALL; TOWARDS NEW COLLAR JOBS

Ipoh, 3 Disember – Sultan Nazrin Muizzuddin Shah ibni Almarhum Sultan Azlan Muhibbuddin Shah Al-Maghfur-Lah telah mencemar duli menyempurnakan Majlis Pelancaran **SkillsMalaysia 2.0: Skills4All; Towards New Collar Jobs** anjuran Kementerian Sumber Manusia yang berlangsung di Institut Latihan Perindustrian (ILP) Ipoh. Hadir bersama bagi mengiringi Paduka Seri Sultan Perak Darul Ridzuan adalah YAB Datuk Seri Ahmad Faizal Azumu, Menteri Besar Perak dan YB M. Kula Segaran, Menteri Sumber Manusia.

Skills Malaysia 2.0 adalah penjenamaan semula kepada Skills Malaysia yang dilancarkan tahun 2011 dengan mengambil kira evolusi teknologi Revolusi IR 4.0 dengan menggunakan slogan “Skills4All”. Objektif SkillsMalaysia 2.0 adalah untuk meningkatkan kesedaran terhadap TVET dan latihan kemahiran yang boleh memberi peluang kerjaya ke arah mencapai negara maju, sekaligus memperkasakan bidang TVET dan mewujudkan peluang pekerjaan kolar baru atau, “*New Collar Jobs*” yang tidak hanya bergantung kepada kelayakan akademik semata-mata tetapi kepada kemahiran atau “*skills set*” pekerja.

Seiring dengan hasrat Wawasan Kemakmuran Bersama 2030, Skills Malaysia menyasarkan 60% pelajar lepasan SPM untuk menyertai jurusan TVET dan mencapai 35% pekerja berkemahiran tinggi dalam guna tenaga negara. SkillsMalaysia 2.0 adalah platform untuk mengadakan kerjasama dengan semua Kementerian/Agensi TVET yang lain bagi memartabatkan bidang TVET dan kemahiran sebagai jurusan pilihan utama di kalangan masyarakat khususnya generasi muda di negara ini.

Dalam usaha untuk menarik minat golongan muda ke bidang TVET dan kemahiran, KSM sebelum ini turut melantik saudara Yusry Abdul Halim atau lebih dikenali sebagai Yusry KRU sebagai Ikon TVET KSM kerana beliau adalah contoh individu yang berjaya ke tahap yang membanggakan berbekalkan kemahiran yang beliau miliki dalam bidang seni.

SkillsMalaysia 2.0 juga akan memperkenalkan lebih banyak bentuk pengajaran berteknologi tinggi yang termasuk dalam realiti maya (*virtual reality*) dan realiti terimbuh (*augmented reality*). Antara bidang yang mendapat permintaan yang tinggi termasuk keselamatan siber maka ia akan ditawarkan di Institut Latihan Jabatan Tenaga Manusia (ILJTM).

KEMENTERIAN SUMBER MANUSIA

3 DISEMBER 2019 (SELASA)